

Den entrevista cu Algemene Dagblad:

Mama di Joran ta kere cu tin adulto envolvi den e asunto di desaparicion di Natalee Holloway

ORANJESTAD(AAN):

Riba Diaranzon, DIARO a tuma nota di un articulo publica den un corant conoci di Hulanda esta Algemene Dagblad, unda cu un reportero di e corant a

entrevista Anita y Paul van der Sloot, kende ta mayornan di Joran van der Sloot, kende ta sospechoso den e caso di desaparicion di Natalee Holloway.

Den e entrevista aki e tata ta

confirma cu el a busca Joran rond di 11'or na McDonald's riba e Diadomingo di desaparicion di Natalee y cu e no tabata sa cu Joran a bolbe sali.

Segun Paul van der Sloot, ta

ora cu algun dia despues mama di Natalee a presenta cu polis y un grupo di camarografo dilanti di su cas, el a haya tende cu tabata Joran kende supuestamente tabata cu Natalee e marduga

di Diadomingo pa Dialuna.

Mama di Joran a splica cu e ta lamenta cu ta solamente dos biaha el a haya oportunidad di wak su yiu.

El a bisa cu Joran a bise cu tur dia e polisnan ta interoge pa oranan largo, unda cu tin biaha nan ta pone den un camber hopi frieu.

Na otro ocasionnan nan ta pone diferente potret di Natalee Holloway tur rond di dje y nan ta yame pa psicopata y violador y nan ta bise tambe cu su tata ta un criminal.

Esaki segun mama di Joran, kende a bisa cu su yiu ta pasando un experiencia hopi amargo.

El a confirma cu riba e mainta di Dialuna, trempa Joran tabata riba e bus bayendo su school.

E mama a bisa tambe cu e ta sigur cu tin adulto envolvi den e asunto aki.

Paul van der Sloot a bisa cu e no ta compronde cu polis a detene bisando cu el a contradeci su mes y cu e a coach su yiu pa gaña.

El a bisa cu despues cu nan a detene, ta un biaha so nan a interoge, unda cu el a contanan mesun storia cu el a conta ora cu nan a hacie pregunta como testigo.

Tambe el a bisa cu e no a bisa su yiu pa gaña, al contrario el a bisa Joran pa semper bisa e berdad.

Pa locual ta e echo cu Joran a cambia su storia, e mama a bisa cu e no sa exactamente pakico Joran a haci esaki, sinemabargo el a bisa di ta sigur cu su yiu no tabata capaz di haci e mucha muher nada malo, pasobra Joran semper a respeta hende muher.

El a bisa cu e no por compronde henter e asunto rond di e echo cu su yiu a laga e mucha muher su so banda di Mariott y e lo kier puntra Joran pa dune un splicacion riba esaki.

Na final di e entrevista, Paul van der Sloot a bisa cu e ta spera cu su yiu por sali liber pronto, pa e por bise cu e stime.

**TELEFONNAN
DI DIARIO
582-6747
FAX
582-8551**